

第一一〇册

方輿彙編

職方典

重慶府部

夔州府部

馬湖府部

龍安府部

潼川州部

(卷)

六二—六三

六三—六八

六九

七〇

七二—七三

古今圖書集成

中華書局影印

古今圖書集成

卷一百一十五

古今圖書集成

卷一百一十五

欽定古今圖書集成方輿彙編職方典

第六百十一卷目錄

重慶府部彙考五

重慶府兵制考

重慶府物產考

重慶府古蹟考

陵墓附

重慶府部藝文一

四賢閣記

鄰母洞記

唐質肅公祠記

合州釣魚城記

塗山古碑



宋黃庭堅

劉幹

王十朋

闕名

元賈易巖

職方典第六百十一卷

重慶府部彙考五

重慶府兵制考

府總

府志

順治十五年設總督四川軍務部院一員駐劄

重慶康熙七年奉裁復設兼制川湖總督一員

駐劄荊州府奉裁今設川陝總督一員駐劄漢

中府

督標中軍管中營副將一員

中軍守備一員

左營遊擊一員

右營遊擊一員

重慶鎮總兵官一員

鎮標中軍管中營遊擊一員

中軍守備一員

左營遊擊一員

右營遊擊一員

重慶城守副將一員

左營遊擊一員

右營遊擊一員

康熙七年奉裁今改設

重慶鎮總兵官一員

鎮標中軍管中營遊擊一員

中軍守備一員

左營遊擊一員

右營遊擊一員

黔彭營遊擊一員

添設忠州營遊擊一員

中軍守備一員

重慶府物產考

府志

府總

麩金 合涪忠州大足俱有

土降香 黔江武隆彭水俱出

鹽 忠州大足榮昌銅梁豐都武隆彭水出今

僅忠州彭水煎

茶 南川黔江豐都武隆彭水俱出

鐵 牡丹 桃竹 補骨脂 合州俱出

荔枝 出涪州城西五里唐時有妃子園中有

荔枝百餘株為妃所嘉當時以馬馳載七日夜

至京人馬多斃然蜀中荔枝敘瀘之品為上涪

次之合州又次之

大龜 涪州出

松屏 出涪州石山間不加人力天然成文

靈壽杖 涪州出

引藤 忠州出大如指中空可吸俗用取酒

苦藥子 忠州出性寒解諸毒

黃心樹 忠州出白居易木蓮詩自序云巴民

呼為黃心樹高四五丈經冬不凋身如青楊葉

如桂花如蓮香色艷膩超然獨芳四月初花開

連謝僅二十日

九節狸 長壽出

方竹 蘇油 天花粉 威靈仙 俱出南川

孤瓜子仁 出江津縣近因遷閩人於此創種

孤瓜子仁漸至繁穰至土產粳稻木棉菓蔬樹

蓄之類俱常物無殊不錄

花竹簾 江津出

實竹 綦江出
蘇薰席 墊江出色深碧

重慶府古蹟考

府志

本府巴縣附郭

古巴子園 在署左巴子園內有巴山石二十
七枚石盆裝盛天造地設不假人爲因名
古灘城 在府東相傳巴子於此置津立城
霸州城 在府東南二百六十里唐貞觀中置
南平州後改霸州後又廢入南平縣
江州縣城 在府西張儀築漢爲縣巴郡治
枳縣城 在府西史記楚得枳而國亡卽此晉
桓溫伐蜀移枳縣于臨溪其城遂廢
東陽城 在府西一百里齊割巴陽置此縣
廢南平縣 在府治東南三百三十里唐分巴
郡置此縣及置州後州廢以縣屬於渝州
狼狽鄉 在府治山谷中土人構屋高樹謂之
閣檻不解絲竹惟擊銅鼓視木葉以別四時父
子同諱夫婦共名尚鬼祈福
廢丹陽縣 在治東南三十里唐置
廢隆化縣 唐置後改賓化屬涪州宋屬南平

軍

廢漢初縣 在府西北一百九十里梁置新興
郡西魏改縣曰漢初隋屬涪州唐宋屬合州
廢巴川縣 在治南唐置屬合州宋因之
廢隆渠縣 在治東南宋置屬忠州
屈原塔 在治東一十里蘇軾詩屈原古壯士
就死義甚烈世俗安得知拳拳不忍決南賓舊
屬楚山上有遺塔應是奉佛人恐子就淪滅
萬壽縣城 在治西唐初分江津置此縣初名
萬春後改今名
廢赤水縣 在治西北一百三十里隋置屬涪
州唐宋屬合州
禹王廟 在治南渡江里許考禹娶塗山氏故
塗山禹廟歷建久矣郡人倪斯蕙題聯云四日
辛壬癸甲八年河漢江淮今祠廢址存
塗后祠 水經云江州塗山有夏禹廟塗后祠
杜預所謂巴國江州乃今重慶府巴縣卽江州
非九江之江州也因並建焉祠廢址存
御書樓 在府學內收貯欽賜書籍
澄清樓 在朝天門內覽秀環翠俯瞰大江
桂香樓 在文昌宮後
華光樓 一在府治西三里一在忠孝坊
轉閣樓 在治西
潮音閣 在治北
紫金閣 在治北一里許
萬佛閣 在府治前
金碧臺 在府治後宋制置使余玠築

招賢館 在治左宋余玠建其供帳一如帥府
所居下令曰欲有謀以告我者近則徑詣府遠
則自言於郡所在以禮聘之故士之至者咸得
其歡心言可用隨才而任不可用亦厚遣之
雙狀元碑 在儒學三賢祠外渝州守黃鳳翔
爲宋紹興狀元馮時行開禧狀元滿國寶題
西湖池 天啓癸亥嘉平月郡人倪斯蕙題書
西湖古跡
洗墨池 在文昌祠內相傳張三丰畫帝君像
洗墨於此
溫泉 在治北有泉冬夏溫融浴之却疾
孝父石 在南紀門外一字城先民居於下其
子至孝城石崩墜冒過房屋寸木不損因名
金子石 在金子門外邑民偶遊遇張三丰民
云此係吾宅所供仙像三丰鑿石與之攜歸父
見黃金奇之往觀以金合石痕上竟長一塊因
名

文星石 在治東學宮前卽縣學風水

岑陰石 在治北小江右石上記董公死難處

龍王塘八角池 在縉雲山上古傳其龍萬曆

間至京師請封康濟侯今土人遇旱求雨頗驗

其上四時有雲氣

江津縣

七門郡 在縣西魏置北郡隋廢

荔枝園 在縣廳西北相傳唐時置

金注字 昔有僧憩此有鳥銜僧衣袖牽之而

上見石縫中有一金注字手不能及遺跡尙存

金釵影 在周溪上石磧中有淺水一段周廻五六尺隱見雙金釵影按縣志在周望山下昔有孝婦周氏姑以渴病思泉旱甚水涸婦方徘徊山下求之忽遇異人謂曰與吾釵吾與若泉婦與釵彼投地而清泉出婦飲姑病愈今石磧中有淺水一泓周四五尺金釵一雙隱隱可見碧雲莊 在縣西石壁上書此三大字御史壩 在小河岸賈師灘上側有古塚傳云御史墓前有地可耕人訛傳爲御史壩

大佛崑 在石門對岸古鑄大佛寺於巖上約長十丈許

狀元字 在南江口石壁上刻狀元二字下有墓亦名狀元墓旁有溪亦名狀元溪

挑燈石 卽蓮花石在縣江北水中不常見見則人占豐年古有題詠鑄於江岸石壁云乾道辛卯正月十九天水趙宜之陪王屋李希仲泰原王直夫同寺首座珍况來遊飲不至醉翌日晚再陪希仲王屋李孝友書此以記歲月云喜見挑燈石還通飲闕洲諺云傳父老間出顯公侯此石之生其名挑燈凡或出水百穀用登土必榮達喜莫不增諺云實証振古已曾惜哉窄狹難伍來朋

石蟹泉 一在石佛寺後一在禪居寺前歲早求雨於此石隙中微水出有蟹隨之黑者卽雨黃者無雨其在禪居寺者古砌石磴九十九級每級高一丈級盡處石壁十丈大刻一十六字云天下大亂此處無憂天下大旱此處薄收邑

人徐大本李廷實俱有詩見藝文

石灘雙鯉 在長池里有二石橫臥於灘狀如鯉鯢鬣皆備里人周岐鳳有詩

臥牛灘 在縣南笋溪河有石梁委曲過河以張孝子得名詳見節孝類邑人王珙有詩

范鎮村 在縣治西長池里樓臺山之麓范鎮常寓在此後人慕之因名

石板井 在縣治西南四十里明正德辛未都御史林俊破賊曹甫於此

仙馬石 在張村溪石壁上有馬蹄跡二百餘處故名

鄰母洞 在確溪游心山之左二里許

金紫 去縣四十五里日出雲黃紅或云以上有金紫光祿大夫墓

龍門 去邑六十里兩峰如門故名

二賢 去縣七十里以母雅石公恕先後居此

虎腦 去邑七十里如虎蹲踞上有杜萃老石刻

官山 去縣治八十餘里有墳塚名爲官子

墓制度弘敞巧麗因名

龍登 去縣一百里舊傳宋太祖曾登山有虎

跳嶺雙峰絕頂有井泉有龍塘巨蟹泉飛泉棋枰石聚寶峯盤陀石千佛巖紅巖等景

東南之山曰雙山 去縣一百二十里二峰突起青翠可人邑進士鄒魯結書屋於中因以自號有歌

紫金 去縣八十里邑進士楊鈺有詩

大塹 去縣一百二十里高峰聯峙僅通一塹爲路正德辛未副使李鉞以請兵破賊方四於此

鶴山 去縣二十里上有仙鶴池邑封御史楊

濟之莊居於此因號鶴峯

游溪 去縣四十里唐史趙延之會遊此

樓臺 去縣八十里邑參議陳渭世家其側上有觀音閣渭微時潛修因扁樓峯書院遂以自號

營盤 去縣一百二十里正德辛未流賊方四屯兵於此尋敗去一去縣二十五里四圍峻絕中如砥平古屯營之地正德庚午都憲林俊破賊曹甫屯兵於此

寶鼎 去縣一百三十里上有三石如鼎正德年中鄉耆鄧綱率衆築城爲寨盜不敢侵

銅鼓 一在縣治西一百三十里與插旗山相對一在縣南一百里上有石如鼓

北之山曰石佛 去縣北一里一名鍾秀宋張商英隱此

雙溪 在縣東南十里自播夜郎流經南川入

江卽綦江河今南川口是也二水合流故名齊

移江州縣於此見方輿勝覽

黃石龍 在漢東驛下邑舉人夏澤有記

九漑 有董公黑石金釵虎諸名

凌雲 在聖泉寺左一石突起上逼雲霄其端

俯瞰可覆數十人嘉靖己亥知縣太和楊元吉

奇之始題今名築臺於下

雙鶴 在縣江北提學張鯤題曰雙鶴雲流僉事劉卿有詩

虎崑 在虎頭山石壁上有字題云紹興乙亥右朝奉郎守司農少卿杜萃老題次乾道三年丙戌杜宗甫磨崖

文仙洞 在聖燈里

蓮池 去縣東二里許廣袤三十餘畝池中蓮花紅白相雜可愛宋元中鑿渠引水入泮池環帶學宮由大通橋注之江邑人以此卜科第宣德初知縣袁旭以水東泄乃築堤捍水成化中知縣宋潛亭於上尋為左右者侵尅弘治中知府毛泰行縣復之古淪學士江朝宗記後開塞不常嘉靖乙酉知縣王貢令疏之至於丁酉知縣楊元吉復加疏理葺其舊亭扁曰君子池建池亭三扁曰水心亭邑副使楊彝記縣令楊元吉有詩

流杯 在縣西二里大江側石盤磅礴鑿渠引水為九曲碑刻磨滅莫考春夏之交遊人泛觴為樂踰月則漲沒矣邑人明經龔恕有詩

天水 在縣治北鐵佛寺之上其水無源四時不竭相傳摸石祈嗣得石者男得瓦者女間亦有驗弘治季年邑庠生季林曾有事於此其子廷春詩載藝文

龜子 在縣西一里諺云龜石跳三公到景泰中三跳至腰果江淵陞太子少師工部尚書

石門 一在縣石門驛一在縣南筭溪河兩岸巨石如門邑舉人曹英莊居於此因以自號

金釵 在縣東一里清泉可飲甚旱不竭邑人李鑑有詩

高寨 在思善鄉一山平地突出插天周匝縣治僅通一路昔人避兵於此卒成保障今上有崇林寺

北寨 在魯市里與石笋相接上有屯兵遺址茅草寨 在石門驛一里

石寨 在龍登山後一山突起四圍石壁皆一百丈深闊百尺僅有一路通焉

七門廢郡 在南江口

萬壽廢縣 在漢東驛

江州廢縣 在馬驤嶺

香草樓 在縣西南三十里李膺益州記江州縣西南有仙池昔仙人居此池側多植香草

清溪廢井 在筭溪里

皮袋廢井 在華蓋山下

長壽縣

煉丹臺 在縣北一里相傳徐神翁煉丹處今石臺有坐痕跡含小窩可掬指中常有硃砂見明嘉隆間士人取以書書史每天清月朗臺間煙霞直起故邑景以北觀煙霞為最里人何其微九日登臺詩徑滿藤蘿石滿苔仙人不見瑞香開登臨尚有清風在好對煙霞送酒杯

廢樂溫縣 在治北一百一十里唐初置屬南陵州後屬涪州元省置有巡檢司魁星樓 舊址湫隘知縣黎時舉捐料未建署掾事史彰拓基閼制捐俸庀材鳩工以成之知

縣黃龍見命匠丹彩黝堊之尊經閣 在治左山勢蜿蜒直達大江萬曆中邑侯周廷侍建閣其上形家名文筆點水

紫雲巖 在治後一百里石壁篆刻紫雲巖三字有紹興中古刻碑文漫漶不可識

清陰洞 在學宮左丹巖下高二十餘尺形勢深廣古有榕木翳翳陰森昔人鐫古詩於石上楷書類黃庭堅又有大碑高尋於上刻端雲巖三大字壁多古刻磨滅不可讀昔許魯齋常憩此門人趙進與立石以記其事

蓬萊洞 在治南龍山寨下高數尺深廣尋餘其上有石刻人物

風月臺 在廢樂溫縣白虎山有石龕題風月之臺圖經云風月之臺四字甚古其上石巖桃花水出焉有洞古邃幽深銀鴨石笋杳然人境今按風月臺在廢樂溫縣桃花洞在今縣治側未知孰是

晏子山 在治北七十里宋賢譙定夫發晏亞夫淵所居講學處譙學於伊川晏學於考亭

古書山 去樂溫四十里有大曆初石刻云昔人砌山路見石穴中有蝌蚪數軸古書之名起於此

鳳山讀書處 志云白虎山亦云鳳山在涪水西一里山麓刻讀書處三大字旁識云端平二年鶴山赴召過樂溫為史子書按眉人史大用讀書於樂溫白虎山撰崇德廟碑者

牧騾化 在鳳山下有韓村宋開禧中土人韓

申之見山陂有綠衣端坐指揮其僕入村沽酒有白驪斂草其傍即文昌書所謂牧騾化也今上石巖中有畫風洞境象即此

三友巖 在治西石壁上有三友巖三字

永川縣

佛巖寺 去城二十里鑿石爲洞洞內鑄諸佛像有三井俱名聖泉洞外旁修殿宇一層如置空中危巖峭壁藤蘿掩映真有名勝景也

石筍 去城五十里千嶂凌雲一峰如筍故名

現有丹爐在上相傳有仙真來往

石腳跡 去城南三十里其石磐廣闊數圍上有仙人雙足跡其巨如箕故名

登雲坪 在治南七里有毘盧寺明建文帝

潛修於此有坊曰隱帝流光其山似盤長十里橫八里結爲大坪秀峰羅列四面朝拱

榮昌縣

羅漢寺 建自唐天寶元年左右有圓覺硯右有

生佛硯硯通中殿約百餘步名曰氣眼修建僧

懷忍批題者孝感皇帝昔有聖燈今殿閣尚存

葛仙嶺 去城東十五里晉時葛洪遺有仙桃

蹟嶺巔有石乳乳上生桃樹根無寸土春生枝

葉縣人以結桃多寡卜中式名數亂後樹毀無

存今尚有桃香仙嶺碑

五桂樓 在縣東宋乾道間邑士五人同奏名

太守曹岍建造樓以旌之

海棠香國 在縣內海棠無香此地產者獨有

香舊治前有香霏亭棠花亭今俱廢

綦江縣

廢南平縣 去治南九十里宋置南平縣

觀音堂 在治南石壁丈餘勒觀音大士像傍

書吳道子寫萬曆三十二年許忠建閣覆之

白雲觀 開創時掘得白雲石硯及古鏡上鑄

湖州青銅照子並淳祐通寶古錢尚有古劍山

開創時掘得古劍一口今存

大道觀 有一石勒古佛遇旱迎省焦枯即興

雲雨往往有驗

銅鐘寺 江心湧一銅鐘擡昇寺中因以名寺

今存

南川縣

三溪縣城 唐貞觀置屬南川城甚高險

賽樂園 在治西郭宋太守封固以邊境清寧

築爲遊宴之地有賞心風月二亭綠猗軒

懷清臺 在治西二里秦寡婦清得丹穴而擅

其利以自衛始皇以爲貞婦爲築此臺今燬

老龍洞 在縣東宋時宮中災帝夢龍繞內殿

問其名答曰吾重慶府南川縣四十八渡老龍

王也因勅封四十八渡金角老龍王明萬曆間

復至南京救火加封普濟洞行雨得道金角老

龍王古碑尚存

孝婦泉 明初有民婦錢氏甚窘奉事孀姑至

孝其夫外營姑病篤思飲泉水時天寒嚴冰未

解氏把甕涕泣忽石穴中湧水清涼乃汲歸以

飲姑姑病遂愈因號爲孝婦泉

飛雲樓 普澤寺有四樓曰飛雲萬卷衍慶凝

香

合州

巴子城 去州南五里又忠州東一百里江北

岸亦有巴子城一名臨江故城蓋濮縣地也

石鏡 涪江中有石圓正如月冬出水三丈碑

目涪內水石鏡題名云大曆三年此石出兵甲

息黎庶歸六氣調五穀熟石照即石鏡也

沉厚堂 唐張柬之守合州姚崇薦其沉厚具

相才故州治內有沉厚堂今名景厚本此堂中

篆繁辭八字字徑四尺李陽冰書碑陰

招鶴亭 宣和間許生愛其鄰人朱受家羣鶴

起亭作詩招之鶴果來集朱憤而愬諸朝上命

均之鶴以離羣悲鳴不已道君爲書額賜焉

夜雨寺 僧智果所居取李義山巴山夜雨之

句也

龍骨寺 爲龍蛻處巴中記云墊江多龍亦即

秦漢之墊江縣也

通曉橋 周元公判州事常與客奕一老人來

觀口流涎而香公驚問曰汝龍也何以至此老

人曰安知之公曰以涎知耳忽大雷電起老人

化龍泝溪而上公乃令琢方石二十四片以鎮

之即通曉橋其處在城內之明月街

龍多山 去州西一百二十里

赤水縣 唐人刻字此山高明竊深變態萬狀

下視涪水如帶煙霞出沒等語

志道觀 觀東大池爲則天放生池

靈山院 泉自巖出瀦爲方池大旱不竭

駕鶴軒 圖經云晉永嘉三年有馮仙舉家十
七人此山昇去按馮仙即馮蓋羅也今仙臺觀
有燒丹處志道觀壁間繪像猶存

清華樓 在州東晁公武作記

紫清樓 在州治土主廟前

朝宗閣 在州內下瞰金石磧

養心亭 宋張宗範所居背山面水構亭其中
周茂叔偶至愛之題曰養心亭而爲之記

讀書臺 一在州東北七里漢末薛融讀書處
一在州西二十里唐康元良讀書處

合江樓 在治內杜甫有詩

姚臯山 去治西八里古有姚臯廟

巴嶽山 去治南五十里勝覽云此去絕頂蟠
螭若爐上建元天宮旁有崐崙洞在懸巖石壁
上有一窄路可進乃張三丰修道之所內有蒼
玉山有仙茅唐長慶中採樵者服之仙去山中
有古刹巴嶽寺側有三丰手植木蓮花樹一株
高五六丈葉如梗楠花如菡萏每遇科年花朵
可決鄉試名數又有玉版泉其味甘美四時不
竭相傳昔人淘井得玉版印扣之清響如磬聲
此皆三丰遺跡也宋周濂溪題有木蓮花詩
計壽山 去治南三十里古寺後有雲蓋松一
株傳云張三丰手植每日出時祥光照殿前

望仙樓 在治西南關山上唐縣令趙延之修
建並題

元天宮 在治南巴嶽山巔上張佳陰有詩

祝英臺寺 在治東二十里寺前里許有祝英

臺故里坊又數里有祝英臺墳墓又二十里白
沙寺路瀑裏灘岸上有祝英臺書題大懽喜石
碑行數武又有錯懽喜石碑皆祝英臺書

望仙樓 在治西唐合州刺史趙延之仙去後
人爲建此樓

退思閣 在治廳後嘉靖中知縣胡濂建

忠州 東坡 白居易詩何處慙慙重回首東坡桃李
種新成又有西坡亦居易故蹟東坡有移政種
花一亭西坡有極目亭

宣公書洞 在江之南

樂天書洞 在城內

白鹿洞 在文昌宮後昔有二獵人逐白鹿入
洞失鹿所在但見二碧瓜食之仙去

木蓮洞 在州治北八里許宋紹定庚寅嘉州
錢子山有題詠

荔枝樓 在州西南白居易建有詩荔枝新熟
鷄冠色燒酒初開琥珀香欲摘一枝傾一盞西
樓無客對誰嘗

東樓 在治內白居易詩林巒少濕地露雨多
陰天賴此東樓夕風月時悠然向敏中詩南浦
花臨水東樓月伴風

西樓 白居易詩小郡大江邊危樓月照前

四望樓 在州南白居易所建詩曰江上新樓
名四望東西南北水茫茫

四賢閣 在州後知州王闢之建四賢謂劉晏
陸贄李吉甫白居易宋黃庭堅爲記

鳴玉亭 在治西城外半里
連理亭 去州東北十里宋建有連理樹相去
二步而合

神溪 在城南崖以神禹得名

巴子城 古漢縣

皇華城 宋度宗潛邸於此改名咸淳府

屈原塔 春秋時屬楚因思屈原故建在滄井
溪邊蘇子瞻有詩

引藤山 在州之南山出引藤可以吸酒白居
易詩閑拈蕉葉題詩句悶取藤枝吸酒嘗

酆都縣

五雲洞 漢王方平陰長生二仙修煉丹井也
常有五色雲見因名焉久經兵燹閉塞童謠云
若要洞口開除非王孫來

麻姑崖 相傳麻姑飛昇於此故名

道山洞天碑 字大如輪世傳呂純陽筆在平
都山中

筆架山 在縣治前枳江之中心有一石亭然
澄峙如山上有遺題橫勒數字云天下文章莫
大於是旁一聯云閣乾坤之大筆寫江漢之雄
才冬時水落石出則見之

五靈樓 在平都山上唐段文昌建

挹翠樓 在治右

拱辰樓 在治北

凌雲閣 在平都山頂有碑刻凌雲二字

涪州

廢樂溫縣 去州西北一百一十里唐初置屬

南鄰州後屬涪州

赤甲成 漢末爲赤甲兵所聚事見寰宇記

江心石魚 且湖上流有石刻雙魚皆三十六

鱗一銜萱草一銜蓮花有石秤石斗在旁現則

年豐

吳公堂 宋太守吳光輔疏城南谿便民取汲

其孫信仲仍守是邦臨溪建堂因名

四賢樓 在北巖四賢謂程頤黃庭堅尹焞譙

定也

彭水縣

紹慶城 宋時建在大江南岸故城尚存

採芹城 明洪武中建相傳施南土酋叛上命

藍玉征之築土爲城以屯兵者在半山中

綠陰軒 在城內黃庭堅築巉巖峭壁俯臨長

江上有榕樹夏則陰濃蔽日清風徐來涼氣襲

人雖盛夏不知暑熱也游覽者頗多題詠或書

或鐫滿於石壁

飛來石 在縣治前相傳自月巖飛來方廣六

七尺周身文甲形勢嶙峋上有一竅如滿月傍

聯三星如貫珠宋鐫銘其上曰月巖銘八景之

一

洗墨池 在縣城南門外綠陰軒傍黃庭堅著

書洗墨於此池水盡黑至今如故因名

天倉 在縣西北石峽中有小蹟四圍石限沙

石堆聚如倉倉盈則年豐倉虛則年歉邑人以

此卜歲

陵墓附

本府 巴縣附郭

巴子塚 在府治西北五里左右石獸石龜各

二麒麟石虎各一卽古巴國君塚也

蹇尚書墓 在府城北五十里明宣德十年奉

勅葬此

江津縣

白君塚 在白君山宋知縣白啓之墓

杜莘老墓 在縣南宋殿中侍御史丞相虞允

文過此題曰剛直御史

馬將軍墓 在馬驍山宋馬覲也

王居士墓 在縣治南一里失其名天順盜發

有二絕鐫墓中石壁

宋王夫人墓 迪功郎劉鼎撰有墓誌銘

艾尚書墓 在鼎山後名發明仕至吏部尚書

弟發其發官三墓俱在碑壞時序莫考

馮隱君墓 在石橋里宋朝奉通判水州軍州

事

樂巴墓 在鶴山下漢書云巴字叔元蜀郡人

也漢順帝世補黃門令遷桂陽太守定禮興學

政事明察後拜議郎守光祿大夫與杜喬循行

州郡素有道術能役鬼神尋拜尚書有嘔酒爲

雨救成都失火事靈帝時上書極理陳蕃竇武

之冤下獄自殺或云成都人

江侍郎墓 在縣北三河口故雲南參議贈嘉

議大夫戶部右侍郎兼翰林學士江英之墓其

直所撰歲久堂傾頽嘉靖辛卯孫江遠狀上巡

按御史丘道隆行提學道舉行議未決己亥提

學副使毛稽故牘責之郡縣出帑錢若干縣令

楊元吉治其工

胡子照墓 在縣南七十里

綦江縣

明王應熊墓 葬縣治東龍角溪

合州

濮子墓 在瑞應山

酆都縣

楊御史墓 楊奉命巡方登平都山忽九蟒繞

車而化遂葬焉邑人立祠於墓上肖像祀之前

建九蟒殿世傳九炁化身蓋明弘治二年成神

也

彭水縣

長孫無忌墓 在彭水縣信寧鄉內唐顯慶間

無忌貶黔州歿葬此

田祐恭墓 在縣境內祐恭仕宋知思州歿葬

於此

元狀元向午鳳墓 在郁山鎮鳳凰山下

重慶府部藝文一

四賢閣記

宋黃庭堅

忠州漢巴郡之臨江墊江縣也其治所在臨江故梁以爲臨州後周以爲南賓郡唐貞觀八年始爲忠州其地荒遠瘴癘近臣得罪多出爲刺史司馬故劉尚書以刺史貶一年死陸宣公以別駕貶十年死李忠懿公以刺史居六年白文公以刺史居二年其後州守以四公俱賢圖像爲四賢閣故相贈司徒鄭州刺史南華劉晏士安故相贈兵部尚書嘉興陸贄敬與中書侍郎平章事贈司徒安邑李吉甫宏憲刑部尚書贈右僕射下邳白居易樂天由開元以來訖於會昌四君子相望凜然猶有生氣忠民每以此自負而郡守至者必矜式焉紹聖三年正月知州事營丘王君闢之字聖涂下車問民疾苦曰吏驚而民困故聖涂爲州拊養柔良知其飢飽鉏治猾姦幾於傷手治聲翕然邑中豪吏故時受賂舞文弄法者相與謀曰屬且無類即以智籠小駭吏羣訴於部使者聖涂不爲變且歎曰白頭翁安能碌碌畏吏羞民耶亦會部使者察其爲姦而聖涂治成時休車騎野次各問故老詠四賢之逸事而三君之政寂寥無聞蓋士安卽賜死而敬輿別駕不治民宏憲雖在州六年亦嘿耳樂天由江州司馬除刺史爲稍遷故爲郡最暇豫有聲爾又其在州時詩見傳東樓以宴賓佐西樓以瞰鳴玉溪登龍昌寺以望江南諸山張樂巴子臺以會竹枝歌女東坡種花東澗種柳皆相傳識其處所於是一花一竹皆攷於詩復其舊實種荔枝數百株移木蓮且十本忠於一時遂爲三峽名郡聖涂乃以書

誇涪翁曰爲我記之涪翁曰聖涂急餒寡之病使遠方沐浴縣官之澤可謂知務矣掃除四賢之室思欲追配古人可謂樂善矣樂天忠州於今三百七十有九年在官者鰓鰓然常憂瘴癘之病已數日求去故樂天之遺事蕪沒欲盡聖涂齊人也蓋不熟巴峽之風土又其擊強撥煩材有餘地而晚暮爲遠郡守乃敢慨然不倦興舊起廢使郡中池觀花竹鬱然如元和己亥時追樂天而與之友聖涂於是賢於人遠矣

鄰母洞記

劉幹

孝爲百行先予幹承乏恭南教官聞士人頗道李氏孝友行及予行邑見李語及其母則蹙額涕欲下慨而言曰某少失父賴母兄之教及籍太學而兄喪母亡號踊露哭來奔旣卜宅兆則爲居廬於側庵名爲永慕旣乃四顧於丘隴上偶然數百步之外覩異趣焉於是被荆榛鋤荒翳則巖崖竦然洞穴開豁其高寬可容數百人上扳秀嶺下冽清泉四周修竹東垂瀑布而蕭瑟潺湲之聲洞以虛容聞之冷然善也千里撫掌喜見眉間咤曰天造地設吾以母故得之名曰鄰母以爲歲時享祭休憩所洞之陰北顧瑩城如指諸掌有鄉人爲之序且屬予記因繫以歌曰重巖千古闢靈蹤虛室蕭然曉靄中扶翳開荒正豐熾應知孝愛與天通宣和辛丑上元日酉陽別乘劉行之梅軒書

唐質肅公祠記

王十朋

予始聞彝陵巴東名意其爲邑必壯自予適夔過焉皆最爾邑巴東陋尤甚問其名之所由著曰昔寇萊公歐陽文忠公嘗令二邑地重以人非山川城郭人

物之異於他邦也予因謁其祠訪其遺蹟嘆息而去至一日登郡之東城城下臨奉節縣治問喻君思然曰昔宰是邑亦有如寇歐二公者乎喻君以唐質肅公對予曰是皇祐中爲御史獨立敢言嘗疏論貴戚延斥宰相以貶天下稱爲真御史不敢斥其名而曰唐子方者乎熙寧中首言王臨川不可大用及叅大政奮然與爭是非於天子前氣不爲之屈至不勝其忿而死天下至今稱爲正人吾夫子歎未見剛者唐公非剛者歟名節凜然固無愧乎忠愍決瀘淵之策文忠移司諫公書也其令是邑有殊績異政故相張公天覺嘗筆之於墓碑矣邑故有令如此而無祠非缺典歟令聞之慨然不謀於僚不役於民卽廳事之東隅易亭爲祠求畫像於江陵得之故家丹青一新儼然如生觀者莫不起敬如見其冠豸觸邪正色立朝時也且丐予記其事予謂質肅公之高名大節固已大書特書於國史何以記爲然是邑賴公而重有不可不書者令蜀人捫膝先生子也有家學治邑有能聲觀其所慕可以知其人矣乾道二年六月未嘉梅溪王十朋記

合州釣魚城記

闕名

山在州治之東北渡江十里至其下其山高千仞峯巒崑崙崑崙然可觀其東南北三面據江皆峭壁懸巖陡然阻絕至修城之後鑿山通道方可登臨其西南山稍低於此築城高一十仞城之門有八曰護國青華正西東新出奇奇勝小東始關其山脚周回四十餘里峯頂有寺曰護國堂殿廊廡百有餘間宋紹興間思南宣慰田少卿所建至元戊戌爲兵火焚燬灰

燼寺門之外突然一臺曰釣魚臺其上平正可坐十餘人上有巨人足跡年代雖遠風雨不能磨滅岸邊插竿之目猶存焉此臺乃在山之巔俯視大江懸崖千仞相去險遠釣可施乎名爲釣臺似不侔矣竊嘗稽之古之洪水爲患蕩蕩懷山襄陵此山三面據巖渠嘉陵二江自西北而來衝於山之西流至合州城下則與涪江會同皆浩浩蕩蕩環繞山足而東下往古水患之際勢必懷抱此山則釣魚之名必自始矣乎後有石庵凡二十四片石斲成乃開山祖僧石頭和尚自造也宋高宗南渡之後北兵益熾彭大雅奉命入蜀命郡縣圖險保民太尉甘閏至州觀此山形勢可以據守故城之郡牧王堅發郡所屬石照銅梁巴川漢初赤水五縣之民計戶口八萬丁一十七萬以完其城西門之內因溝爲池周迴一百餘步名曰天池泉水汪洋旱亦不涸池中魚鼈可棹舟舉網又開小池十有三所井九十二眼泉水春夏秋冬足備不乾城中之民春則出屯四野以耕以耘秋則收糧運薪以戰以守厥後秦鞏利沔之民皆避兵至此人物愈繁兵精食足兼獲池地之利官民協心是以能堅守力戰而効忠節東有溝曰天淵溝東北有山曰天淵嶺龜山與魚山對峙城上呼語相聞元憲宗蒙哥以此駐蹕王堅去任之後繼任乃安撫張珏也有謀略應敵出奇制勝尤有過人其時北兵大營駐漢中利沔初冬嚴寒則來攻圍春夏暄熱則復退去已來歲值大旱自春至秋半年無雨北兵圍逼其城意城中無水急攻之一日至西門外築臺建橋樓樓上接桅欲觀城內之水有無城內知其計置砲於其所

次日憲宗親率其兵於下珏命城中取魚二尾重三十斤者蒸麪餅百數俟緣桅者至其竿木方欲舉首發砲擊之果將上桅人遠擲身殞百步之外卽遺鮮活之魚及餅以贈諭以書曰爾北兵可烹鮮食餅再守十年亦不可得也時北兵遂退憲宗爲砲風所震因成疾班師至愁軍山病甚遺詔曰我之嬰疾爲此城也不諱之後若克此城當赭城剖赤而盡誅之次過金劍山溫湯峽而崩期年之間世祖皇帝卽位北兵大集總元帥蒙古等軍於本州雲門虎頭渠口魚村富谷石子山等處連營對壘攻圍甚急而城中設奇制勝或擊卻之或掩襲之斬獲累捷是後不敢久畱城下春去秋來去沒不常者十有餘年安撫張珏以功陞渝州制置使繼以王立爲安撫立至任益嚴守備兵民相爲腹心聲息稍緩卽調兵討捕鄰邑之降北者取果州之青居城復潼遂州境土攻鐵爐城堡承命旌賞權授遷秩矣至元丁丑北兵攻圍甚急加以兩秋致旱人民易子而食王命不通三年矣戊寅春正月渝城爲守門者獻之北兵矣制署張珏被俘而魚城孤而無援矣北軍畢至攻城且曰宋已歸我國久矣爾旣無主爲誰守乎城中之民惶惶汲汲危如累卵釜魚知其禍在頃刻然皆協力而無異謀王立命衆曰某等荷國厚恩當以死報然其如數十萬生靈何今渝城已陷制置亦擒將如之何愁蹙無計歸家不食其家之義妹者乃北營所掠北平渠帥之妻名熊耳夫人初至王立問之答曰妾姓王氏立乃喜曰作吾之妹侍吾之母待獲爾夫俾其完娶待之若同乳之妹已數年矣至是熊耳夫人亦憂城危

禍及素知有兄在北營而不敢言因見王立之憂而告之曰妹本姓李今成都總兵李德輝是吾親兄若知安撫待我恩禮必盡心上聞親來救此一城人民立乃大喜卽命致書熊耳夫人常爲兄作鞋有式兄甚愛之仍作一鞋以奉必見手澤爲信遂遣儒生楊解等潛赴成都納款李相得其降書知妹在魚城喜不自勝乃遣使星馳赴闕奏聞仍領兵親至城下先遣解歸語王立責夜豎降旗於城上次日北兵見說納款降欲登城而門閉壁堅而不能入又次日乘舟至城下民皆懽呼焚香望拜李麾退圍兵汪總帥蒙古軍曰我等攻守此城十餘年戰而死者以萬計憲宗皇帝亦因此城致疾而崩臨崩遺詔來降必因攻困致斃赭城則當上爲先帝雪恥下爲亡卒報讎李相諭慰未決又數日朝使適至奉詔旨魚城旣降可赦其罪諸軍毋得擅便殺掠宜與秋毫無犯李相仍推其功於汪總帥賈立降書大軍隨退李相命城中之民悉力陷城築門旬日仍徙其民復舊治所士農工商各復其業黔黎老稚咸感李相再生之恩安撫王立隨李相至京奏賀對品蒙授懷遠將軍合州軍民安撫使合民遂於城之西南隅建樓立祠以奉李忠宣公歲時祭祀以報其恩云

塗山古碑 元賈易巖

至正十五年三月初四日涪陵賈易巖撰華陽誌云渝郡塗山禹后家也古廟廢於宋至元郡守費著仍建廟嘗考娶於塗山之說一謂在此一謂在九江當塗東漢郡志云塗山在巴郡江州杜預考曰巴國也有塗山禹廟又古巴郡志云山在縣東五千二百步

岷江東圻高七里周圍三十里酈道元水經云江州塗山有夏禹廟塗后祠九江當塗亦有杜預所謂巴國江州乃重慶府巴縣江州非九江之江州漢史蜀志可稽至今洞曰塗洞村曰塗村灘曰遮夫石曰啓母復合帝王世紀蜀本紀華陽國志元和志等書叅考之禹乃汶山郡廣柔人其母有莘氏感星之異生禹於石紐廣柔隋改廣柔爲汶川石紐在茂州城隸石泉軍所生之地方百里彝人共營之不敢居牧靈異可畏禹爲蜀人在於蜀娶於蜀古今人情不大相遠導江之役往來必經過門不顧爲可憑信先是帝會大父曰昌意爲黃帝次子娶蜀山氏生帝顓頊顓頊生鯀鯀生帝帝之娶於蜀又有自來又謂蜀塗山肇自人皇爲蜀君掌塗山之國亦一徵也至會諸侯於塗山當以九江郡者爲是東溪郡志云山在當塗杜預云在壽春東北今有禹會村柳子有銘蘇子有詩且於天下稍向中會同於此宜矣通鑑外紀亦禹娶塗山之女生子啓南巡狩會諸侯於塗山如是則娶而生子生子而後南巡而後會諸侯娶則在此會則在彼次序昭然會稽乃致羣臣之地或崩葬之所故有禹穴所謂塗山一曰棟山一曰防山紛紛不一太平乃晉成帝世當塗之民徙居於此故亦名其縣曰當塗好事者援此爲說而實非塗山世次綿遠地名改易煩亂傳會不足徵况會稽當塗在禹時未入中國禹安得娶彼哉今特辨而正之庶祠廟之建得其本真而禹后受享於誕生之地尤不可闕爾

欽定古今圖書集成方輿彙編職方典

第六百十二卷目錄

重慶府部藝文二

丈人峰記

明金祺

請速靖水蘭疏

余文燭

大磯賦

羅洪載

蟹泉賦

王應熊

新建壁山縣記

江朝宗

三仙石碑記

周達

糯米堆記

王敦夫

西南平播碑

蹇達

重慶府部藝文三

題禹廟

唐杜甫

題忠州興龍寺所居屋壁

前人

宴忠州使君姪宅

前人

初到忠州

白居易

忠州刺史詩

前人

荔枝樓對酒

前人

東樓

前人

題銅梁望仙樓

趙延之

銅梁木蓮花

宋周敦頤

送王靜深還合州

明史鑑

合州寫懷

梁潛

重慶府部紀事

重慶府部雜錄

職方典第六百十二卷

重慶府部藝文二

丈人峯記

明金祺

合州夾江東四十里許山名九盤有石峭拔狀若人形屹立巖畔其腹前隆起若抱甕誠奇觀也予按節嘉定每挽舟過此未嘗不深愛而竊痛焉嘗記春秋時子貢過漢陰見一丈人抱甕負水灌園子貢曰不亦勞乎何不鑿木架梁前輕後重以汲水則用力少而成功多丈人曰有機事者必有機心子貢慙而去嗚呼丈人之言其關於世教也大矣夫機心一動鳥見之而不下獸見之而却避况加於人乎桔槔之用其設心未必如此但充之則無所不至矣此丈人所以不為也人人不為丈人之不為則舉世相忘於純一無偽之天何忌刻之有奈何世之人騁私智於權寵之間陷賢人於網羅之內自以為得計殊不知大失計害於而家凶於而國莫之省悟皆丈人之罪人也可勝歎哉予因觸目而有感遂名其石曰丈人峯大書於此用以為世之有機心者勸

請速靖水蘭疏

余文燭

題為水蘭渠魁就戮西南定局已成宜慎勦洗之略以速安攘之效事臣乞身歸省踰伏田間者四年餘日聞彥賊負隅狂逞而通寇奢崇明爪牙之先事者苦於虎穴難探每謂餉不足兵不多曠日綿歲老師費財民膏日竭而賊焰日張岌岌乎莫知所終矣幸督撫按臣新授方略道臣劉可訓鎮臣侯良柱以一族之師破賊十餘萬衆直如拉朽摧枯豈專師武臣之力仰賴皇上威德遐邇莫不震疊故兩臣身先士卒

卒背水決戰直以忠義勝之耳元兇大慙殺戮幾盡倘寬脇從之誅西南半壁已可從而底定矣廟謨弘遠將欲勦洗以盡殲之拓土開疆此最勝之烈也惟是駭鹿易逐而狡兔多窟土彝烏合實繁有徒嘗見貴州解圍之後賊無堅壘直搗大方當時倘加持重豈至自棄前功懲前毖後必須先事詳計謀出萬全以畢此不常有之奇勳所當慎者一也功名之地人所欲居軍氣方揚易於輕敵而功高取忌則挑釁養寇逗逼以自圖者又未必無之嘗見三路進兵期會牽制勦撫異見庚癸爭呼幾同聚訟若非賊寇門庭道鎮獨當一面誰為出奇制勝故必協力同心呼吸相應將伯必可助予因人不妨成事前矛後勁殺賊招降總屬廓清勿致見分爾我築舍道旁失此不再得之機會所當慎者二也水外膏腴已無難收入版籍進之深林密箐陵谷險阻攻取為難城守不易嘗見遵義郡縣其地者近三十年則壤所賦後何無補於公家而城郭官室官僚守衛之費先以不貲安在廣地之不荒而遠略之足勤也鬼方僻壤力爭諸原得將安用當先有控馭成畫以厝置之勿徒疲腹裏以事荒服而竟委此血戰之功於草莽所當慎者三也西南用兵九年兵戈所駐荆棘生焉諸所經過室廬荒廢萬竈寒烟蕭條滿目今幸大捷正哀鴻集澤之日矣兵貴拙速不尚巧遲速則乘機巧則生變况亡曾傷彝之餘躡以大軍有何堅陣即當剋期蕩平甦此轉輸之子遺勿使遺孽復安又生多事倘或尚須斟酌亦當蚤為請命罪在可原者待以不死使知雷霆自擊天地自寬戰勝之師寧戢而不聘以安反

側前之勁敵功在攻克後之窮寇功又在收服勿但貪功妄殺零碎報捷致時可削平仍賣劍買犢之無期窮兵黷武自焚可虞干羽兩階豈曰虛語庶楚蜀滇黔每歲百萬之金錢不至長付之逝波也慎以相機速以結局安危難易晷刻是爭審時度勢西南安攘之急著似不出此

大磯賦

羅洪載

大磯九磯之首磯也在松磯東南遠見巨石橫江然未嘗一至也每夏江水泛溢聲震百里艘艘上下斷絕蓋絕險矣時夏予繫艇而觀焉因爲之賦予觀大磯之奇也發乎石筍之支鎮乎岷江之口其來也或聳而爲峯或委而爲坡或深而爲阜及其底於江也巨石嶄嶄截江之半橫互而孤峙若虎之伏形若龍之驤首當秋至而水落江過其下靜若鏡光厥波不揚兩涯相距曾不里許若尋丈之可量及夫春氣融夏日烈雪山頽冰壑決注雨連晝百川奔溢江於是乎潏潏湔湔排天浴日傍溢彌望陡起千尺馮夷喜而嘆洋天吳駭而喪魄放千里而下趨忽此磯之見阨鼓萬頃之澎湃戰數仞之巨脊若勁兵之過強梁勢不相下氣不相伏而力足勑敵也於是時也江欲衝石而東注石欲抗江而西折勇心不回鬪氣愈傑其怒也搖地軸而欲動其號也震天樞而若裂日月爲之薄晦風雲爲之慘惻巨鯢化而渤澥遷立鯢母猛而風沙四塞駛萬雷於九霄鼓三軍而一決轟百里而輦輦壓千峯而躓跌蓋江之最險而觀之奇絕也予昔下巫峽越漢襄北歷秦晉南遊江浙蓋嘗魂目於胥潮悸心於砥柱而掉膽於瞿塘三者天下之

至險也曾不知此磯之險殆有甚焉不但爭衡而頡頏予於是又知夫天下之事所謂奇特者必有激於不得已夫然後舍其庸常抗爲雄偉插入翼而天飛驚一鳴於衆耳功足以蓋當世名足以垂千祀莫不奮發於困阨振掉乎險阻拂其志而後通達窮其身而能興起彼區區之流俗當莫不神阻氣折顏汗而心死殆有似夫此磯激奇於此水不然何森森茫茫悠悠洋洋千里就下與天同光忽然破天地而震響咤風霆而飛揚慨物理之固然而信予說之非荒唐

蟹泉賦

王應熊

宮園璧水地準孔林闕炳靈之奧府濬洪業之巨浸抱經者鱗集擢秀者穎森人競擅其美富物亦忘其高深觀夫平鋪靜藻對竦幽林最巖跌以紅蘚琅玕冒乎綠陰神龍或伏而似螭脈望未仙而爲蟬士固類此物亦宜欽乃有南離之子辰宿之精其誕降也莫測其乍出也有情假碧甃之空嵌吐翠乳之泓澄去鰾鰾之腥穴詎蚯蚓之與爭爾其韜光用晦舍同尚獨漱清寡營類飲簞而已餘伏祀儼思比戢劍而受讀養蒙坎之冲澍甘渫井之秘馥靜也淵潛動則陽復負魁形爲羣穗所宗告昌期不假著而卜笑鑽毀於元龜噉饒流之汗犢寧捐彼而取此伍四靈之可畜於是石室先生豔旃綠之以綺楯考之以瑞璣披雲衣以酌甘擘霞箋而命槩唱雅奏之連蜷錫珍銘於切砭且進諸生而命之曰天遠人邇慎占書兮氣至物應爰居諸兮荷嗟介夫似巨儒兮漸漬達海去沮洳兮百家諸子其支渠兮荀揚軻師亦既潛兮六經中天乃歸墟兮智弗逮物達識獻兮風騷自命

捨沫餘兮爾雅不熟助軒渠兮筐綫來請衣裾裾兮蟪蛄爲奴行睢睢兮犯霧以僵敗貞姱兮膠漆忽解渝本初兮雌黃緝翻戈甲具兮絳蕭躁觸徒舖啜兮解解相笑聚衆畜兮試酌新水滌厥沔兮諸生俯而思仰而奮額手以進於先生曰直寬溫栗公材雄兮爲時龍湫澍維豐兮沃我道腴理黃中兮舊史氏聞而讀曰斛水之藏靈兮何抱息之深深兮蟠泥而升霖兮貽我以清音兮維邑中之黔兮

新建壁山縣記

江朝宗

國朝法古以治天下而百司庶府皆建官署以出政令爲安民計也其或地理殊遠則增立縣治爲便民計也今壁山設縣其爲便民之計乎昔人云四山如壁又云山出白石明潤如壁故名羣山環抱臥龍之蟠諸溪映帶長蛟之伏縣治建秦漢時隳於陳復於唐仍隳於梁至晉陞爲壁山宋之時人才崛起其間若馮當可蒲國寶聯登狀元而進士則有蒲震蒲謙王大齡輩諺云狀元雙及第進士屢登科此固地靈則人傑之驗也元時燬於兵併入於巴數十年間盜賊縱橫稅糧逋負強者凌弱富者吞貧而刁風日甚由僻遠官府故爾成化癸卯巡撫都御史巡按御史暨藩臬二司覈實以聞上允之仍立壁山縣時江西饒州府餘干縣張公名本字汝崇欽承上命來知縣事下車時一蒿萊地耳其地南北相距百二十餘里東西半之與人皆慮壁山之地無木可採縣治之大所費不貲抑何所措卽曰點金厥成靡易而公謂其無難爰命堪輿度地之形勝而定其位縣治建於中儒學建於南藩臬二司建於學之北至於府館陰

陽醫學僧會道會二司廟宇壇場預備倉演武所徐
徐修理次第築城衛內而捍外焉廣袤七百二十餘
丈城有四門東曰迎恩南曰拱秀西曰臨高北曰演
武園以石洞覆以高樓木石竹瓦動以萬計公即不
取之於民民樂趨事而亦罔知其勞也肇工於癸卯
之夏告成於丁未之冬儒學教諭李時偕生員陳堯
道耆老陳仕阜李文魁輩胥謂我公開創之功若是
其大可不立碑以記其實乎乃述事實詣於余以文
請予唯朝廷設官分職唯令爲親民之官也漢明帝
曰郎官上應列宿出宰百里苟非其人民受其殃旨
哉言乎張公之令壁山不但役志於建築而向之恣
肆之民常驚避廢業孑子無依者公下車來隨捕隨
獲無一能道人以爲神昔焉民之牛馬藏之臥室尚
被刦去今則牧之山林無有柵欄之殫行李之失於
道塗者久而主復得之所謂夜不閉戶道不拾遺復
見於今日矣執政者署曰專治新邑盜息民安宜哉
於乎張公庶幾乎古之循良者皆若人焉而民豈有
不安哉故因輿人之請樂書以復俾後之誌壁山名
宦者知所採云

三仙石碑記

周達

邑城之東去城里許有山曰月宮以城中每見月出
適當山之絕頂宛然如月出此山因名曰月宮焉山
之巔爲波崙寺山之腰爲懸崖山之麓爲平原環以
瓊水護以石洲竹木森森可樵可漁希巢山築墅此
原已之東阜三石鼎峙蓋自混沌初分即有此石三
石之形其一聳拔而方峻如雅之松嶽其一蜿蜒而
狹長如頌之墮山其一頂圓而足銳如易之盤石世

傳以爲盛唐時有三異人倚石煉氣九轉成功氣結
而元神同日飛昇因名此地曰三元村當日丹白世
遠盡圯莫可蹤跡惟三石獨存巋然可愛雖日月之
銷鑠風雨之飄淋霜雪之剝削所歷春秋不知幾何
而三石無恙與歲俱新村之父老與吾曾大父同時
者遺言載此三石者自異人老去別無可見惟天久
旱而將雨則三石汗出津津日不能乾不旋日而果
雨如天久雨而將晴則三石白氣杲杲雨不能濕不
旋日而果晴以是靈異因名此石曰三仙石夫曰三
元村以三人之元神會於此也曰三仙石以仙之道
氣托於此也何今之石即昔之石也而今石獨無昔
之靈異耶無亦我朝聖主在御世德相承盛德格天
雨暘時若年來非無旱也而未如倬彼雲漢之久則
旱未烈亦非無雨也而未如月離於畢之多則雨未
苦也旱不烈則石不潤雨不苦則石不燥此皆庶符
君德而蒙其餘惠者也是烏可謂今日之石無復昔
日之靈異耶兩岐之竹產於此焉連理之木產於此
焉謂非三石潤燥未發之精蘊所鍾不可也而築墅
此原者何幸得借其休坐岐竹以終日撫連理而盤
桓瀟灑熙熙忘帝力於何有哉夫余既有此樂矣使
獨樂而不同於人非公樂也欲公樂於人而不記石
之靈異則人或不知石之可樂也因述父老之所傳
者而紀之庶乎二三君子懷三仙而乘興玩三石以
娛情因寄所托放蕩形骸之外是亦尼父所謂志道
據德依仁之餘而游藝之意也其他青笠綠蓑戴風
雨而不知歸者此則山人之獨有其樂而未肯與廟
廊諸君子細論者也

糯米堆記

王敦夫

江發岷山安行千里至巴渝上流之極有灘曰大小
糯米堆中流巨石實當其衝高下對峙江之西來浩
然橫直指二灘之上觸爲濤瀾喧喧震掉危險可畏
舳艫銜尾而來一或不戒則與石遇雖有智力不能
施設淳熙乙巳常平使者廣漢楊公持節峽道政尙
寬靜民人宜之公明刑之餘廣求利病思其有便於
民則曰蜀江之險者莫甚於峽之一道而是灘之險
實居峽道之首於是出金捐粟戒屬邑吏悉用疏鑿
會春水涸命里正趨事悉徒奔走歡呼鼓勇爭效其
力至於砥平向之爲患者自是而息舟船之下安然
順流以達吳楚無復齟齬舟之爲利當施之無窮也
夫大江之險自神禹之後未聞有人能致其力而公
乃能盡誠力行之取必於成功則公之愛人利物豈
特一道而已哉充而至於天下可也昔西門興利史
遷所嘆白圭壑鄰孟子不與公之用心彰彰如是安
知異時不書之史策深嘉而屢嘆哉敦夫董其役目
擊盛事大書諸石以昭示不朽

西南平播碑

蹇達

皇帝聖神文武輯寧宇內華夏蠻貊罔不率俾獨蜀
徼播賊楊應龍憑險負固輒縱部落屠劫我邊毗直
指王公趙公先後以疏聞上一再聽督撫諸臣相機
撫處舞干數德不欲遽勤兵也賊愈恣叛逆飛練之
役敢格殺我戰士且及材官矣詠議張公以疏請上
西顧宵衣謂今御史大夫兼右司馬長垣李公故以
中丞撫邊屢奏膚功特允廷推起公於家以少司馬
兼大中丞總督四川湖廣貴州軍務公以己亥六月

初十日兼程臨成都賊再屠綦江城參將房嘉龍故遊擊張良賢死之公督藩臬諸大夫亟議所以足兵餉之策疏請速勦尋直指崔公按蜀疏奏一如公議上悉嘉納聽公便宜行事大學士趙公沈公協襄宸斷大司馬田公蚤決計謀大司農陳公預撥兵餉太宰李公御史大夫溫公掄材紆畫蓋自九列而下無不念明主宵旰冀西土廓清者公乃以計緩賊迄所徵漢土兵雲集公分蜀黔楚進兵爲八路四川以綦江路屬總兵官劉綬合江路屬總兵官吳廣永寧路屬原任副總兵曹希彬南川路屬聽用總兵官馬孔英以參政張君棟護綦南謝君詔護永合軍事參政張君文耀參議劉君一相副使史君旌賢僉事徐君仲佳督餉兼紀功總餉兵於成都則左布政使前程君正誼今盛君世承按察使沈君季文紀功於渝則參政王君嘉謨副使傅君良諫督餉永合則參議熊君寧奇若渝守傅君光宅分理四路餉兵推官高折枝並贊理南川路監紀之事其黔楚二鎮則貴州烏江沙溪平越爲三路屬總兵官李應祥以按察使楊君寅秋參議張君存意護軍事督餉兼紀功則以參政郭君廷良副使洪君澄源尤君錫類參議梅君國樓湖廣偏橋爲一路屬總兵官陳璘以按察使胡君桂芳參議魏君養蒙護軍事督餉兼紀功則以參政詹君啓東副使王君應麟路君雲龍陳君與相蓋中丞郭公支公並以咨會受公成焉公以十二月二十三日移鎮重慶庚子正月十五日奉賜劍登壇而盟曰皇帝憫西南赤子爲播賊所荼毒無寧歲所委任責成者甚重若等助哉其一乃心力以相予行天罰

不則三尺具在不敢私至以主辱臣死自盟諸將士聞之無不感動願爲公盡力者公又熟計征播主職渠魁而海龍囤夙稱天險逆賊謂此囤不可升必據囤以延須臾之死必諸將集囤下乃可協擒而楠木山羊簡臺等洞爲逋逃淵藪婁山崖門桑木等關爲逆賊門戶方擁悍苗以死守非有先入關者何以鼓衆志而速成功此其責在蜀將湖廣偏橋內外俱九股苗遺種賊特爲外援內四牌不掃則三渡未易窺無由抵海龍囤貴州彝狡而兵寡兼苦軍興又水西與逆賊世依唇齒必操縱在我始足以折安酋而奪逆賊之氣是又楚黔諸將之責因進綬及廣等檄璘及應祥等授以碩畫郭公支公並以機宜示黔楚諸將奉約唯謹以二月十二日遵令進兵總計八路溪土及燕趙越粵秦汴滇南馬步卒二十餘萬督餉張君等焦思蒿目曾不後時師行糧從戰士踴躍故鷹揚虎賁朱整漆甲並盪磨朗耀於巴渝滇楚間焉一切零賊諸路日多斬獲其自縛請降者悉受而生全之二月十四日綬督兵攻楠木山羊簡臺等洞破之迨朝棟率諸苗衝營綬復督勁兵大破之而桑木關山險箐深仰攻爲難折枝祇奉公檄身先參將周國柱等前已大敗賊於官壩營望草壩遂乘勝衝關之左右兼擣其中以三月初八日破桑木關適孔英至自關中又敗賊於金子壩蓋南川路視諸將先登入關二十九日綬亦破婁山關矣四月初一日廣兵薄崖門郭通緒者敢戰當關廣伏兵攢槩刺之以初四日破崖門關再力戰於木牛塘因據三圍山山倚海龍囤高圍數十仞賊所恃爲左右望者部苗萬餘列

柵堅守廣督希彬等奪以勁兵而綦南二路仍各撥兵三千助之遂據此山之上俯視囤中樵汲從此斷絕而南川路衝其前鋒綦江路爲左右翼擊賊永合二路併攻復連破養馬養雞等城海門龍鳳等關賊不復敢格鬪灑淚率妻子夜退棲囤上而以鐵鑄關爲守囤倚諸崇山又鬼方多霖雨白日晦冥其兵將集囤外未敢先發先是崔公甫臨成都即移檄諸將不許干後時之誅公慮蜀四路各自爲心檄按察張君悌糾合諸將綬及廣等督兵夾攻鐵鑄關破之雖賊黨已奔潰而囤前重圍復嶺較囤後尤甚賊日夜守以梟鷲藏礮伏弩俯瞰我兵紛紛擊之如雨以是將兵盡銳仰攻尚未遽克適公聞先大夫艱又慮諸將解體投淚草檄刻期破囤且懸重賞激先登者並檄責廣充爲監事官以懲其報酋死之誤崔公更嚴檄諸將急攻毋爲賊誘諸將愈人人畏罪會璘前受計於公支公及直指王公檄責竟以一旅之師掃九股苗開路進兵而中丞江公以撫偏沅臨鎮復與公及支公計合遂連破長坎馬瑙青龍三囤所向無前公與郭公操縱水西直指宋公並嚴諸將吏使水西大敗賊於母氏囤殲虎翼以寒賊膽而應祥又以招撫爲進攻連破諸囤入三渡關抵白田壩與璘俱集囤下護軍張君等遵公指授會五總兵督各路副參遊守暨宣慰等輪日協攻先之以綬及應祥繼之以璘及廣所將兵攻其後折枝孔英督各漢土兵攻其前以六月初五日綬等前後夾攻破其二城初六日廣及璘協攻而六路兵亦爭先以雲梯攀援而上逆賊橫槩四顧無一死黨計無復之遂雉經而死廣兵

及各路兵於烈焰中取會屍一軀兼縛田氏朝棟兆龍等而巨黨何漢良田一鵬孫時太馬千駟等一一縛之賊遂無噍類矣是役也獲大賊首一千二百餘名斬級二萬二千六百計俘獲賊屬五千五百計招降男婦十二萬六千計全獲被擄男婦一千計拓地千餘里公露布以聞獻俘京師上大悅以平播功告廟百官畢賀斬朝棟等於市已頒詔海內及巡按御史公勘報績制府中丞列鎮監司而下論功爵賞有差初播州故爲漢唐郡縣自乾符間陷於南詔楊端取而據之遂爲獷穴公議改土設流爲府二州一縣八衛一特請於上易府名遵義平越列雉爲城設總兵憲使坐鎮之仍設學置博士弟子於是修文偃武綏輯遐邇仁懷珍州之間稱一都會焉夫西南諸彝盤據於萬峰疊嶺中緩之則怒臂吠聲毒我邊疆討之則據險憑寨踰險而鬪敗則豕奔鼠竄窮蒐曠日故自古用兵未有甚得志者毋論麓川之役罪人竟漏天誅卽正統間蜀都蠻爲梗大司馬提虎旅十八萬討之久而始克然根株未擷俄復嘯聚彝患所由來矣方逆酋之忤文網也一再撫之不效自宜改絃乃當事者顧忌迂徐迄會淫惡逆逞又倉皇加兵漸損威重公初臨錦官料賊情若觀火操成算若析薪賊已在公掌握中矣第蜀往歲平蠻多藉兵於土司見無他兵可恃所調土兵含悲孤兔且視以爲奇貨陽戰而陰利之甚藉口乏餉濡滯遷延卽幸而成功又皆謂吾土兵之力寧復知縣官哉公是以請調客兵雖數止二萬而先聲巨測蜀漢兵謂四方兵且至其氣愈壯重以餽糧土兵亦無敢桀驁卒相濟以成

而默消諸酋長跋扈飛揚之心所爲國家慮爲西南慮者何其忠懇也計兵二十餘萬日費二千金稍淹歲時遽滋勞費公苦心殫力所以激軍士之用命折將帥之邪謀散羽翼之羣兇寢鄰酋之陰庇者率炳幾先而冥中其會故師期僅及三月費僅踰一百萬而殲八百年大慙若摧枯拉朽且拓地張官一以中國之治治之瘴雨蠻烟之鄉末爲樂土公之功不弘且遠哉而公不自功也蓋昔召公受命平淮彝故其詩曰明明天子令聞不已而凡此蔡功韓愈獨以不赦不疑歸美於憲宗之斷豈不以武功告成固召公裴公之勞然非周宣唐憲知人善任亦曷以臻茲哉上御宇中興媲美周宣非憲宗所敢望而平播之伐知人善任則與召裴之平淮蔡異代同符公曰非臣與諸將士之功而皇上之功有味哉公之疏也大臣不當如是耶播故在渝境渝人尤覩播功而感公賜沅陵張君舊以巴令垂聲茲則以播之役自粵西移渝而佐公運籌轉餉奏功者謂合守知巴縣事葉聯芳宜伐塗山之石紀功勒名以永渝人之思而謂不佞達宜有言遂悉其顛末而銘之其辭曰惟皇憲天秋殺春生九夏八埏快觀昇平么麼小醜最爾夜郎狠毒我毗鄰闖我疆帝謂蠢蠻且無窮武其命諸臣相機撫處舞干解網仁比舜湯彼昏無忌敢逆顏行臺省疊聞皇赫斯怒心膂股肱訐謨以助乃命司馬專秉戎事尚方寶劍特茲以賜公拜稽首夙駕渝州閩外禁思帷中運籌插羽徵兵飛檄督餉矢天誓師開誠命將桓桓元戎洗洗武夫如熊如羆臨坤之隅組練光生馬騰士飽鼓行無前魂銷羣獠旣斬層關

遂拔列城風鶴咸順草木皆兵魍魅徹靡柵寨披裂取彼兇殘銳鋒刃血累卵一髮賊勢瀕危尚倚免窟螳臂以支我武載揚霆擊雷噬會以六師圍之三匝黨惡千羣駢首伏鉄疾若呼風易若摧枯黔旅重來楚歌四起盡赭其山兼赤其水殲厥渠魁縛彼羣兇脅從罔治巢穴都空于疆于里乃文乃武漢官重列威儀再覩柔桑沃壤而織而耕歸馬放牛絃管春城昔也播地猿啼虎視今也市廛龍鱗編次昔也播人畏首懷疑今也食粥鼓腹含嬉昔也播俗鳩舌馬革今也文物詩書縫掖播人自謂西南諸彝陽收羽翼陰實傾離彼昏鞠頑天奪之魄竟墮術中遂取赤族威靈濯濯王道平平逆則誅鋤順則全生轉相告語強衆弱寡強且不支弱何爲者自時厥後誰敢不其覆車不遠鑒此應龍露布星馳夜同清晝共識天顏喜茲凱奏公躬踞階匪臣之力獨蒙聖斷乃得稱塞帝謂司馬惟汝元忠克茲壯猷奏是膚功甫出東山遽安西土召虎晉公異代爲伍赫赫奕奕公功之垂繼繼承承蜀人之思采之輿論銘之野史億千萬年塗山巴水